

6-9
2

北江先生文集

門人吳兆璜
敬署



北江文卷第五

峯記

桐城吳闓生

起民國元年壬子訖四年乙卯凡四年得文四十二首

王節婦贊

壬子

芳蔡姓王字佩華懷寧柘澗山爲家兄弟十五嗟少孤讀書肄學多勞劬生年庚申十六殂娶吳爲妃四載居忍死事母兼育雛艱哉歲歷二十餘嗣男基濬悲厥初持狀乞記矜里閭綴辭聊述告婦姑

徐太夫人墓表

太夫人桐城劉氏適贈光祿大夫天津徐公諱嘉賢劉故桐城望族太夫人考諱敦元孟塗先生諸父行也嘗遊汴汴撫桂良入覲宣廟舉所爲駢儷文以進時論榮之太夫人幼秉家訓濡染禮則

年二十一來歸徐氏時汴方亟舅通判君奉檄主餉贈公年十七從軍賊據河壩据棺槨爲壘與官軍抗眾莫敢進贈公冒槍彈結筏渡河單騎入賊軍賊已宵遁矣遂拔俘女數百以歸其後通判君解軍治河贈公佐父治文書習河事以母喪得疾卧蓐兩載餘竟不起太夫人旣痛贈公積行不顯又以君舅年高忍死娛親盡瘁在室通判君治河有聲親姻賓從雜沓屬集門以內萬端填委一取辦太夫人及捐館鼎彝圖書外無長物太夫人育兩子一女堵持門戶恆累日不舉火而處之夷然閒輒道家世盛衰及古節概事飭其子且曰汝父有大志鬱沮以終汝曹束脩自愛所以振衰宗光前烈者庸有旣乎貧非吾憂也自子女幼時卽以禮法繩之稍長督益嚴所與游必覩其人旣長有成猶日誨視弗少貸二子亦恂恂受命若孩稚初通判君歿族長老有令鄢陵者請移家

往太夫人不可曰家門仕宦餘蔭今不自立而寄食於人懼吾子之不振也鄢陵令罷官歸視太夫人所爲歎曰健丈夫也家其不替矣其後子世昌世光偕舉於鄉眾皆稱說太夫人太夫人愈自撫挹昂母以一第自隘及世昌成進士入翰林太夫人乃稍色喜始贈公從通判君治軍懷慶又佐治河事自恨未得科第雖以主簿待選不肯御官服太夫人亦不御嘗語世昌曰汝父早世志不售汝能以科第進吾乃敢易命服及是以七品禮服及告身祭告贈公墓乃進御焉光緒丙申十一月寢疾卒年六十四後贈公卒三十有四年有詔旌表如例太夫人既卒幾何年世昌由內閣學士擢侍郎入直軍機授巡警部尙書出爲欽差大臣東三省總督經營邊圉備禦殊域徵還爲郵傳部尙書再爲軍機大臣體仁閣大學士晉太保勳威閎闊累積崇絕世光亦以勞勩洊升某官人

以爲累世湮阨及茲始遂太夫人夙昔惕量之衷食報在是矣而
時事旣益棘世昌盱衡國難忠悃幅憶多劫遇不得申悵塞深憂
蹙蹙然無以慰吾母也烏乎此古所謂憂盛危明不自滿假者非
秉太夫人之教而善承其志者乎識者卜徐氏之澤爲未艾也贈
公初聘黎氏未娶卒太夫人生子二世昌世光女一適顏世棟封
臂奉姑姑歿夫婦同殉某夙與世昌遊習其家揭其志行大端所
以保持其世者於墓道之阡以詔後焉

劉際唐云全篇神氣注重末幅
文筆奇宕而意味深厚無窮

張獻羣墓志銘

晚清之世有奇士曰張宗瑛獻羣性剛氣豪材力遑絕勇爲趨義
不怵禍害旣岸偉自負不忍嘿嘿隨曹眾同生死思務標蠹節角
以大震爆於天下遭晚季濁亂百維弛疏壞爛眩反是非可否白
黑朝野惰荒覬媮苟活罔捄振闕鄙小夫方角智能極佞調媚

阿權豪貴競要遮毫毛利塞饑渴君則於邑陰喝侘僚懔慙忽忽
且發狂居恆撒手俛仰指畫天地睥睨旁近閒芒不得尺寸資地
借發舒乃傾智力於學學不韻一名初喜兵法取傳記古今名將
戰得失度地畫砂用自推校又習歷代典章法制輿地沿革閒及
詩歌音韻訓詁歐西東漸之學說從所親章君以官事踔海西邁
出亞丁灣蹠伯林購外國械器能以義彈伏漸欺頡毒遂躒巴黎
躡英倫徑大西洋跽華盛頓窮探恣覽浮東海躡日本而歸更閱
滋多耳目充拓返鏡內憾愈怫戾不可聊人亦用嫉惡之無與合
閒過武強賀先生先生得之大喜曰此怪物也吾當寶有之先生
方主保定文學館君乃痛自折詘抑抑諸生後執卷從先生問難
爲文章植三古聖哲屈原司馬遷相如揚雄班固韓愈於前痛筆
絕馳亢與揖讓豪情侈志遏謐屏絕而波濤光怪璘彬駭幻炎爍

炤爛所著文中苞英涵靈神趙鬼伏孤往冀出蠲寢與餽時既莫

之知顧益自喜曰吾其幾矣

李剛已云頓挫處逼近韓公

殫精併命汜不休惕家裸

貧又性篤孝二親繼殂益用摧剝遂頓憊不能起疾且革怡然無

少戚容就卧榻自爲墓文寄視其友吳闔生且曰死當銘我宣統

二年某月日竟卒年三十二於是徒友相與驚歎君嘗稱舉知我

惟賀先生與闔生最君既抔折賀先生亦下世獨闔生孤在四望

皇然不敢負死友綴生平爲銘

李剛已云數語落足以貫金石而泣鬼神

銘曰

烏虜張子志伉不讐而邑邑以死遺骨在邱書在紙後千百歲知

者其累欷憑弔於此

李右周云字字造出奇崛而氣體渾然昌黎所謂乘酣逞雄怪也

鹽山何君墓表

往余客朱經田中丞所與慶雲蔣君相好也蔣君之戚何之鏊治
園遠在吉林聞余來亟郵其父母大父母行狀介蔣君乞表墓之

文簡書敦促至於三四余諾之未及爲旣而余以事北上未幾而武昌首義天下騷動豪傑紛起十旬之間國體聿更海內英髦材彥之士乘時競出角智併力謀所以革新敝俗策進國勢余與蔣君相見於風塵擾攘閒語及治園則去年死矣先令猶諄諄以余文爲言蓋慕隴久成胥余文而歲事也嗚乎良可哀已重違賢者之意雖魯鈍不可不自敦率乃撮行狀大略爲文授蔣君致諸何氏君諱某鹽山人世有禮法父某沈毅好學秉義自將不妄處人及君甫冠而父已篤老家事一埤遺之遭捻亂家室蕩然益勤奮趨事思以所遇傷親意先大夫主講蓮池書院士輻奏並進君聞大喜亟詔其子來學誠之曰行勉之學不得師無所成名非所以顯親也又曰學先制行汲汲於名抑末耳若去樸訥務華飾寡廉鮮恥以逐亡等之欲斯乃非人吾不願汝曹效之也生平不僞語

不以詞色假人遇有不可痛斥不能爲地光緒二十六年二月某
日卒年幾何葬某所配崔氏傅氏子之銘之銘女六人狀所具如
是足見以其人矣先大夫之教蓮池也畿輔風氣爲之豁開材雋
士爭先出門下其遠所州縣不盡來則展轉傳紹風教流衍推而
益廣今日之講新學收黨徒興事叛業者大率當時之選也而鄉
里先達有德行識度提挈子弟正其趨嚮其功尤不可沒鹽山慶
雲於畿輔爲邊境距省治遼遠同學中著者推賈恩紱佩卿才氣
犖犖不徇流俗顯聞獨早而崔炳炎蘭溪何之銘冶園蔣燿奎冶
亭三君文行皆卓立有稱當時能導率後進開拓智識競存寰宇
於庸衆中舉其姓字如臨雲漢而覩列星厯厯可指數焉世運益
急新進後生多主激烈劇進視諸君子所爲已若老成耆宿或且
以儒緩持重而意少之況上溯其先輩高曾之儀型益隔世遠絕

矣承傳襲受雖有淵源庸足道乎風會之蕩激推移窮而復返亘古今踵躡一轍非獨今茲之變然也要非有閎識毅力之君子相與持之則流極將無所底止斯其所維繫顧不重與夫豈爭逐於耳目咫尺之間而較量其得失者哉余表君之義蓋不欲爲世之急功名者言之惜乎治園之不及見也

姚叔節先生云後幅頓開異境沈鬱高朗

開國祭文三首

代

芒芒大陸畫此神州喘生喙息萬派同流誰執其機厥維豪傑爛爛國華孕於鐵血曰維吳生眇焉學子奮身挺出不顧其死徒步國門天高日曜歛然變作九藪騰踔流星四裂血肉橫飛黃農遺祚蜿蜿來歸維葉在苞匪刃莫解不有大俠始基曷賴園邱峩峩巨浸所浮赫焉其光煥我新猷靈兮歸來盼矍無絕千秋萬歲昭此義烈

右祭吳烈士越

天贊中華組民爲國五族交孚同驩共戚黃雲大漠牧馬千羣嗟
來無遠咸我弟兄秩秩邦媛淑問克紹恭承大闕允慈允孝勅釐
嗣胤德譽無虧共和旣建面內來歸是翰是屏靖厖戢賦北邊清
夷繫母之教敬詔來禩萬葉雲祢式續式似勿替本原泱泱國旗
表天照海五色光華爛焉長在於鑠靈祇亦是攸賴

右祭喀喇沁親王母福晉

滔滔政海惟得人難誰當狂流而厝之安五族共和艱危與共譬
彼夏屋豈資一棟爰有烏君滿洲之傑扞我于艱材力雋絕方標
偉度以示其儕庶幾舊族連袂偕來天不假年一昔而逝疇昔有
位誰于予治臨軒慨歎悼此碩人追維前勞實多苦辛逝者不蘇
其又奚說撰詞喻誠以曉時哲

右祭步軍統領烏珍

國慶追祭文二首

代

烏乎泱泱大陸風起雲從曾不十旬竟此全功江漢滔滔實居維

首袒臂一呼遂收九有伊豈異人秉何殊術至誠所極可格天曰
誠之既孚捷於景響遂揭國徽以彪天壤追維先烈實曰艱哉挺
身犯難不顧顛隳前仆後繼齒積如糜誰實迫之具此壯志吾儕
今日乃食其賜賜則多矣功不磨矣大勳未集傷如何矣江漢浮
浮武夫滔滔勉思後效毋墜前勞旂旄史史籩豆有踐駿奔以祭
神聽不遠各勤爾職保我封疆匹夫有責敢誓三光尙饗

右武昌

烏乎荆高云沒我武不揚沈沈千載大陸無光時會既開國風丕
變帝制告終民豪聿見神臯萬里黃帝所區誰無血氣忍此濡需
矯首仰天海飛龍嘯雷震電激日月清照蹉跎不遂委骨荒邱壯
心未已殺魄長留嗟我新民毋忘前烈煜煜國徽自由之血革故
旣終鼎新伊始靈爽式昭曷哉君子尙饗

右京師

嚴幼陵先生六十壽序

代癸丑

民國二年正月侯官先生登壽六十門下士相與謀爲躋堂之獻
或曰吾國自海通以來變端雲詭激而益甚遂開今日之共和可
謂盛矣旣破一隅顓守之習進而謀大同之治政事學術皆當恢
拓遠猷以與列國相見而革進太驟民德不與之俱進虛張狡憤
之氣恐無以爲艱難締造之資顧詹當代之賢豪誰與足領此者
獨先生自爲孤童子時踔海西邁攬擷歐美之藝術負往來入貫
徹天人以所知能還饒吾國蔚爲海內導師民生先覺者二十餘
年在先生前旣絕無因襲華路藍縷獨開風氣之先並先生時莫
與方軌齊驅頡頏而助其聲勢退而顧先生之後皆焉曾無接踵
而繼起者從億兆庸眾中標揭一人之姓名字與東西文明諸國
相抗峙指謂吾國有人以爲我民族光寵績效未弘而先生則垂
垂老矣芘焉而不圖其報義其可安是可以爲先生壽或曰俗之

敝也私利私欲之念盛相與倍道而絕馳非直倍之而已乃務從其本根而剗絕之以爲初無有是也是以邃古以來神聖祖宗典籍制作之留遺旣一掃刮絕而不可復存然猶可諉曰古固不可以律今耳能開今者莫如先生亦舉世無異詞矣辟者又從而齟齬之此其心非果有是非之辨也崇閎壯偉非其量之所及旣神攝而氣奪則務欲傾擠之以快其妬媚之私此人心之大可痛者也先生所學所能旣絕人而獨遠然而徘徊冠蓋之間未始不以斯世爲意乃道大莫容所如輒沮前清垂絕之故事不足道矣民國初立理荒蕨整維綱經猷之大不秉度於先生塵奉以爲大學師而猶不得盡其意以去世之阨先生也如此子以先生之大語之是樂鸚以鐘鼓語夏虫以冰也其孰從而聽之某曰不然此二說者皆不足以當先生也夫悠悠毀譽之不可問也久矣先生之

學兼綜中外舉斯世斯民而大淑之者其所蘊畜固然矣得其時則駕利賴元元享無疆之休澤此民之受賜於先生先生之道自若也毫毛標末無所加也不得其時則止閉門著書以自娛娛抒其閎識偉議以待方來此民之不獲賜於先生先生之道自若也毫毛標末無所損也又烏識夫外論之紛紛者乎雖然先生則無待於世而吾黨之事先生者烏可以忽已乎故春秋之義有之曰天下愈亂春秋愈治皜然於泥汙黜濁而不緇屹然於陵轢蕩濇而不磷揭吾行於日月弘吾教於風雷鳴吾業於金石來者雲從反者風休警一世之湛惑迷溺爲之發蒙而去覆與之蹈厲而優遊雍容旁皇相與觀於先生之門而化焉庶強鄰異種改視易聽而不敢肆其嫚易吾國之憂庶有身乎僉曰然乃書之以爲獻

劉際

唐云高情遠韻以古藻出之以灝氣行之近今罕見

長洲教諭唐君墓銘

君諱錫晉字桐卿無錫人庚申城陷父某闔門殉獨遣君出走比還故宅焦爛從簪井中獲遺骸殯焉荼毒之餘益以縻身殉人自刻厲晉豫旱荒君矍起曰吾責也鳩合鄉人醵錢以應以諸生選安東教諭淮徐海水民就食南下安東當其衝死者枕藉君罄所積以振又牒大府丐親舊集貲蘇常閒得數萬金躬率諸生分給災地山東濱海有蜚備絮衣數萬掉舢船往北風方勁行二十餘日帆檣盡折絕粒弗興庚子之變關中赤地千里君輦金四十萬徂雪入秦履邠乾二州永壽淳化八縣攀厓陟嶠家到戶視旣絕人迹往往得殘骸遺髮豺犬窟中明年金盡孤行千餘里詣行在所謁貲諸貴人復得二十萬以濟以劾邑令貪婪坐落職士民籲懇得復官改選長洲湘中水災大吏議遣君往淮水復溢移湘振

餘款餉淮時浦上流人數十萬有司不能散以屬君君周歷浦廠八十餘所流涕爲言皆泣罷去武昌起義君方主辦江皖振悲傷鬱塞遂得疾壬子十月日卒年六十六葬其所子宗愈宗郭是時青田苦療君且卒猶部署賑事諄諄弗絕也世治亂不一軌要之民爲國本未有謀國而後民者也鼎革以來爭爲負高壯駭之談取驀絕難赴之行震耳目爲快而於實益遠矣振災之舉易窮而難徧論者以非根本之治少之烏知夫大命垂絕之時非有至誠惻怛之君子出九死以救之固且立有淪胥之禍哉如君可以風矣銘曰

宵暝未艾忽蹶而興民今方殆我寐其寧握髮於槃執轡在手一夫不獲若中風走西岳巍巍東海湯湯偉哉造化役我何方星言夙駕載驅載馳春風所拂枯骸生齒喪亂未平萬方塗炭誰其嗣